

萬有文庫

第二集七種

王雲五主編

唐詩紀事

(二)

計有功撰

商務印書館發行

唐詩紀事

(二)

謝道韞撰

國學基本叢書

唐詩紀事卷第十四

張說

宋璟

王邱

崔翹

王光庭

席豫

梁昇卿

張嘉貞

盧從愿

韓休

徐知仁

崔禹錫

裴灌

韋抗

程行誡

李嵩

蕭嵩

劉昇

裴光庭

宇文融

崔沔

崔尙

陸堅

崔泰之

崔日知

魏奉古

張說

八日迎春。賜綵花詩云。別館芳菲上苑東。飛花澹蕩御筵紅。城臨渭水天河近。闕對南山雲霧通。繞殿流

鶯凡幾樹。當蹊亂蝶許多叢。春園既醉心和樂。共識皇恩造化同。

送金城公主云。青海和親日。潢星出降時。戎王子婿寵。漢國舅家慈。春野開離宴。雲天起別詞。空彈馬上

曲。詎減鳳樓悲。

晦日滄水應制云。千行發御柳。一葉下仙筇。青浦宸遊至。朱城佳氣濃。雲霞交暮色。草樹喜春容。藹藹天

旂轉。清笳入九重。

餞唐州高使君云。常時好閒獨。朋舊少相過。及爾宣風去。方嗟別日多。淮流春晚晚。江海路蹉跎。百年屢

分散言歡復幾何。已上四首
中宗時作。

說字道濟。洛陽人。相明皇爲文屬思精壯。長于碑誌。謫岳州。後詩益悽婉。人謂得江山助云。

夜坐詩云。懷哉四壁時。未有五都價。百金誰見許。斗酒難爲貴。落花生芳春。孤月皎清夜。復逢利交客。題戶遙相謝。

岳陽早霽南樓云。山水佳新霽。南樓翫初旭。夜來枝半紅。雨後洲全綠。四運相終始。萬形紛代續。適臨青草湖。再變黃鶯曲。地穴穿東武。江流下西蜀。歌聞枉渚遭。舞見長沙促。心遠居無陋。神和生自足。白髮悲上春。知常謝無欲。

岳陽石門墨山二山相連。有禪堂道觀。天下絕境。詩云。困輪江上山。近在華容縣。常陟巴邱首。天晴遙可見。佳遊屢前諾。芳月愆幽眷。及此符守移。歡言臨道便。旣攜賞心客。復有送行掾。竹徑入陰窅。松崖上空蕩。草共林一色。雲與峯萬變。探窺石門斷。緣越沙澗轉。兩山勢爭雄。峯巘相顧盼。藥妙靈仙寶。境華巖壑選。清都西淵絕。金地東敞宴。池果接園畦。風煙邇臺殿。高尋去石頂。曠覽天宇徧。千山紛滿目。百川豁對面。騎來雲氣迎。人去鳥聲戀。長揖桃源士。舉世同企羨。

岳州山城云。山城豐日暇。閉戶見天心。東曠迎朝色。西樓引夕陰。觀書千載近。學靜二毛深。忽有南風至。吹君堂上琴。

岳州行郡竹籬云。山郡不溝郭。荒城無翳壅。愛人忠主利。義守閉爲勇。苟非小勤瘁。安得期逸寵。板築恐土疎。襄城嫌役重。藩棚聊可固。筠篁近易奉。差池截浦沙。繚繞緣隈隴。矗似長雲互。森如高戟聳。預絕豺

狼憂知免牛羊恐。閭里寬矯步。榛叢恣踏躡。始果游處心。終日成閒拱。

出湖寄趙冬曦云。西泛平湖盡。參差入亂山。東瞻岳陽郡。汗漫太虛間。窘步同行樂。適文亦屢看。山戍上雲桂。江亭臨水關。川途倏忽閒。風景依如昨。湘浦未賜環。荆門猶主諾。何時得余美。載酒游宛洛。

說謫岳州常鬱鬱不樂。時宰以說機辨才略。互相排擯。蘇頌方大用。說與瓌善。說因爲五君詠。致書封其詩以貽頌。誠其使曰。當候忌日。近暮送之。使者近暮。弔客至多。說先公僚舊。頌覽詩。嗚咽流涕。異日上對大陳說忠正。謬人望所屬。不宜淪滯遐方。上因降璽書勞問。俄遷荊州長史。由是陸象先。韋嗣立。張庭珪。賈曾。皆以譴逐歲久。因加甄敘。頌以父之執友。事之甚謹。

五君詠事。

達志美類刺異感義哀顏氏之心也擬焉

齊公生人表。迴天開鶴唳。清論早揣摩。玄心晚超詣。入相廊廟靜。出軍沙漠霽。見深呂祿憂。舉後陳平計。甘心除君惡。足以報先帝。魏元忠。

許公信國楨。克美具瞻情。百事資朝問。三章廣世程。處高心不有。臨節自爲名。朱戶傳新戟。青松拱舊塋。淒涼丞相府。餘慶在玄成。蘇瓌

李公實神敏。才華乃天授。陸親何用心。處貴不忘舊。故事遵臺閣。新詩冠宇宙。在人忠所奉。惡我誠將宥。南浦去莫歸。嗟嗟蔑孫秀。李嶠

代公舉鵬翼。翻飛摩海霧。志康天地屯。適與雲雷遇。興喪一言決。安危萬心注。大勳書王府。舛命淪江路。勢傾北夏門。哀靡東平樹。郭元振

耿公山岳靈才傑心亦妙鷲鳥峻標立哀玉扣清調協贊休明啓思華日月照何意瑤臺雲風吹落江徼
湘流下潯陽灑淚一投弔趙彥昭

王洽然上燕公書云詩曰投我以木瓜報之以瓊琚此言雖小可以喻大相公五君詠曰淒涼丞相府餘
慶在元成蘇公一聞此言移公于荆府積漸至相由蘇得也今蘇屈居益部公坐廟堂投木報瓊義將安
在亦可舉蘇以自代然後爲朔方之行洽然書又曰相公岳陽送別詩云誰念三千里江潭一老翁今日
忘往日之棲遲貪暮年之富貴乎

明皇封泰山迴過金橋御路縈轉一望旌纛綿數十里上曰張說言我勒兵三十萬旌旗徑五百里陝右
上黨至于太原見后真才子也召吳道子韋無忝陳閔同製金橋圖

扈從南山雀鼠谷云豫動三靈贊時巡四海威破關凌曙出平路半春歸霍鎮迎雲罕汾河送羽旗山南
柳半密谷北草全稀遲日移華蓋和風入夾衣上林千里近應見百花飛

將赴朔方軍應制云禮樂逢明主韜鈴用老臣恭憑神武策遠御鬼方人供帳榮恩餞山川喜詔巡天文
日月送朝賦管絃新幼志傳三略衰材謝六鈞膽猶忠作伴心故道爲鄰漢保河南地胡清塞北塵連年
大軍後不日小康辰劍舞輕離別歌酣忘苦辛從來思博望許國不謀身

說赴集賢院學士上賜讌應制得輝字韻云侍帝金華講千齡道固稀位將賢士設書共學徒歸首命深
燕隗通經淺漢韋列筵榮賜食送客愧儒衣賀鸞窺簷下遷鶯入殿飛欲知朝野慶文教日光輝

三相同日拜官奉和御制云大塊鎔羣品輕生偶聖時猥承三事命虛忝百僚師右揆謀華碩前星傳重

資連。寤求舊禮。濫點樂賢詩。賜釜同榮拜。攬金宴宰司。菊花吹御酒。蘭葉捧天詞。寶曆休明盛。頽年晷漏衰。少留青史筆。未便赤松期。

恩賜宴樂遊園云。漢苑佳遊地。軒庭近侍臣。共持榮幸日。來賞豔陽春。饌玉頒王篚。攬金下帝鈞。池臺草色徧。宮觀柳條新。花綬光連榻。朱顏暢飲醇。聖朝多樂事。天意每隨人。

醉中作云。醉後方知樂。彌勝未醉時。動容皆是舞。出語總成詩。

雜詩云。抱薰心常焦。舉旆心常搖。天長地自久。歡樂能幾朝。君看西陵樹。歌舞爲誰嬌。

宋璟

奉和明皇答張說南出雀鼠谷詩云。秦地雄西夏。并州近北胡。禹行山啓路。舜在邑爲都。忽視寒暄隔。深思險易殊。四時宗伯敍。六義宰臣鋪。徵作宮常應。星環日每紆。盛哉逢合道。良以致亨衢。

奉和聖製送張尙書巡邊云。帝道薄存兵。王師尙有征。是開司馬法。爰命總戎行。畫闡崇威信。分廳盛寵榮。聚觀方結轍。出祖遂傾城。聖酒山河潤。天詞象緯明。德風邊地偃。勝氣朔雲平。宰國推良器。爲君挹壯聲。至和常得體。不戰卽亡精。以智泉寧竭。其徐海自清。遲遲廟堂坐。贈別故人情。

奉和御製三相同日上官詩云。丞相邦之重。非才諒不居。老臣庸且憊。何德以當諸。厚秩先爲忝。崇班復此除。太常陳禮樂。中掖降簪裾。聖酒山河潤。仙文象緯舒。冒恩懷寵祿。陳力省空虛。郭隗慙無駿。馮諼媿有魚。不知周勃者。榮幸定何如。

恩賜樂遊園宴詩云。侍飲終酺會。承恩續勝遊。戴天惟慶幸。選地卽殊尤。北向祇雙闕。南臨賞一邱。曲江

新溜暖。上苑雜花稠。壘壘韶絃屢。戔戔賁帛周。醉歸由眇陌。榮耀接軒裘。

開元天子登封泰山。南出雀鼠谷。張說獻詩。明皇御答。羣臣應制。故明皇詩有川途猶在晉。車馬漸歸秦之句。餞張尚書朔方者。燕公說也。明皇詩有三台入武帳。八座起文昌之句。左丞相張說。右丞相宋璟。太子少傅源乾曜。同日上官。錫宴東堂。明皇賜詩。有赤帝收三傑之句。故蘇晉序云。天子作三傑之詩。以命宴樂。蓋爲此也。劉禹錫獻權舍人書曰。昔宋廣平之沈下僚也。蘇公味道時爲繡衣直指使者。廣平投以梅花賦。蘇盛稱之。自是方列于聞人之目。名遂振。嗚呼。以廣平之才。未爲是賦。則蘇公果暇知其人耶。將廣平困于窮。阨于躓。然後爲是文耶。是知英賢卓犖。可外文字。然猶用片言借說于先達之口。席其勢而後驤首。當時矧碌碌者。疇能自異。皮日休桃花賦序曰。余嘗慕宋廣平之爲相。貞姿勁質。剛態毅狀。疑其鐵腸石心。不能吐婉媚辭。然觀其文。而有梅花賦。清便富豔。得南朝徐庾之體。

王邱

奉和明皇答張說南出雀鼠谷詩云。襟帶三秦接。旂常萬乘過。陽源淑氣早。陰谷沍寒多。花縵前郊仗。霜嚴後乘戈。戍雲開晉嶺。江雁入汾河。北土分堯俗。南風動舜歌。一聞天樂唱。恭遂萬人和。

邱字仲山。擢童子科。能屬文。爲吏部侍郎典選。其獎用如孫逖。張晉明。王泠然。皆一時茂秀。蕭嵩引與當國。邱盛推韓休。休秉政。薦爲御史大夫。

撫言蕭穎士恃才傲物。嘗攜壺逐勝。憩于逆旅。風雨暴至。有紫衣翁領二僮避雨于此。穎士頗侮之。雨止。老人上馬呵殿而去。穎士始知爲邱也。明日造門謝罪。邱引至廡下坐而責之。復曰。子負名傲物。其止於

一第乎果終於揚州工曹。

崔翹

奉和明皇答張說南出雀鼠谷詩云。硤路繞河汾。晴光掃曙氛。笳吟中嶺樹。仗入半峯雲。頓覺山原盡。平看邑里分。早行芳草迴。晚憩好風薰。嘉頌推英宰。春遊扈聖君。共欣承睿渥。日月照天文。

王光庭

奉和明皇答張說南出雀鼠谷詩云。省俗恩將徧。巡方路稍迴。寒隨汾谷盡。春逐晉郊來。雲騎傳行漏。煙旄引從臺。惠風初應律。和氣正調梅。雅頌通晨禁。天文接曙台。灞城桃李色。應待日華開。

奉和御製送張尚書巡邊詩云。賢相德符充。朝推文武雄。海波先若鏡。關草預從風。鉞助將軍勇。威成天子功。瓊章九霄發。錫宴五衢通。玉輶龍盤帶。金裝鳳頸驄。虎貔紛儼儼。河洛震熊熊。戈劍千霜白。旌旗萬火紅。示刑夷夏變。流惠鬼神同。寇息軍容偃。塵銷朔野空。用師敷禮樂。非是爲獯戎。

張說送光庭詩云。同居洛陽陌。經日嬾相求。及爾江湖去。言別悵悠悠。楚雲渺羈翼。海月倦行舟。愛而不可見。徒嗟芳歲流。光庭與燕公最善。故云。

席豫

奉和明皇答張說南出雀鼠谷詩云。鳴鑿初幸代。簇蓋欲橫汾。山盡千旗直。郊平五校分。前杖已暄景。後壑尙寒氛。風送簫韶曲。花鋪黼黻文。鹽梅推上宰。禮樂統中軍。獻賦紆天札。飄飄飛白雲。

奉和聖製送張尙書巡邊詩云。聖帝重兵權。分麾屬大賢。中軍仍執政。丞相復巡邊。翁習戎裝動。張皇廟略宣。朝榮承睿札。野餞轉行旂。亭障東緣海。沙場北際天。春冬見嚴雪。朝夕候烽煙。已勒燕山頌。猶聞遣戍篇。五營將月合。八陣與雲連。經略圖方遠。懷柔道更全。歸來畫麟閣。藹藹武功傳。

豫字建侯。年十六。舉手筆。俊拔科中之。後爲中書舍人。與韓休許景先徐安貞孫逖名相甲乙。當時號爲席公。帝嘗登朝元閣賦詩。羣臣屬和。帝以豫詩最工。詔曰。詩人之冠冕也。

梁昇卿

奉和明皇答張說南出雀鼠谷詩云。何意重關道。千年遇聖皇。幽林承惠澤。閒客見清光。日御仙途遠。山靈壽域長。寒雲入晉薄。春樹隔汾香。國佐同時雨。天文屬歲陽。從來漢家盛。未若此巡方。

昇卿與張九齡善。涉學工書。於八分尤工。歷廣州都督。書東封朝覲碑。爲時絕筆。

源乾曜

奉和御製送張尙書巡邊云。匈奴邇河朔。漢地復戎旅。天子擇英才。朝端出監撫。流星下闔闔。寶鉞專公輔。禮物生光輝。宸章備恩詔。有征示矛戟。制勝惟罽組。彼美何壯哉。桓桓擅斯舉。聲華振臺閣。功德標文武。奉國知命輕。忘家以身許。安人在勤恤。保大殫襟腑。此外無異言。同情報明主。

送張說上集賢學士。賜燕賦詩得迎字云。盛業光書府。徵人盡國英。絲綸賢得相。羣俊學爲名。寵命垂天錫。崇恩發睿情。薰風清禁籞。文殿述皇明。日霽庭陰出。池新水氣生。歡娛此無限。清酒自相迎。

奉和御製賜三相同日上官云。睿作超千古。湛恩育萬人。遞遷俱荷澤。同拜忽爲鄰。道合音徽暢。芳融景

命新鼓鐘崇享禮。鷓鴣集朝倫。竊位思官謗。彫容謝木春。慚多無以敘。拙備實難陳。進級懷三少。承光盡百身。自當歸第日。何幸列宮臣。

乾曜開元初。姜皎薦於帝。召見神氣爽。澈占對有序。帝悅之。性謹重。與張嘉貞、張說、李元紘同秉政。居中書。未嘗廷議可否。皎爲嘉貞所排。得罪。迄不申救。君子譏焉。

張嘉貞

奉和御製送張尚書巡邊云。天錫我宗盟。元戎付夏卿。多才思命將。必勇獨橫行。經緯稱人傑。文章作代英。山川看是陣。草木想爲兵。不待河冰合。猶防漢月明。有謀當繫醜。無戰是綏氓。關外專三略。雲中冀一平。感恩同義激。悵別屢魂驚。直視前旌掣。遙聞後騎鳴。還期方定日。復此出郊迎。

嘉貞性簡疏。與人不疑。所薦中書舍人苗延嗣、呂太一、考功員嘉靖、侍御史崔訓。時語曰。令君四俊。苗、呂、崔、員。始爲中書舍人。崔湜輕之。後與議事。正出其上。湜驚曰。此終其坐。後十年而爲中書令。

盧從愿

奉和御製送張說巡邊云。上將發文昌。中軍靖朔方。占星引旌節。擇日拜壇場。禮樂臨軒送。威聲出塞揚。安邊俟帷幄。制勝在巖廊。作鼓將軍氣。投醪壯士觴。戒途遵六月。離贈動三光。槐路清梅暑。蘅臯赴麥涼。持文仰雄伯。耀武震遐荒。衽席知無戰。兵戈示不忘。佇聞歌杖杜。凱入繫名王。

從愿字子襲。舉制科高第。爲兵部尚書。數充校考使。御史中丞宇文融將以括田戶功爲上下考。從愿不許。乃密白從愿盛殖產。占良田數百頃。帝自此薄之。目爲多田翁。後欲用爲相。屢矣。卒以是止。

韓休

奉和御製送張尚書巡邊云。一德光台象。三軍掌夏卿。來威申廟略。出總協師貞。受鉞辭金殿。憑軒去鼎城。曉光搖組甲。疏吹繞雲旌。左律方先凱。中鞞卽訓兵。定功彰武事。陳頌紀天聲。祖宴初留賞。宸章更寵行。車徒零雨送。林野夕陰生。路極河流遠。川長朔氣平。南轅遲反旆。歸奏謁承明。休知制誥。蕭嵩薦與同秉政。帝重之。

徐知仁

奉和御製送張尚書巡邊云。聖德膺三統。皇威被八埏。大明均照物。小醜未寧邊。國相台衡重。元戎廟略宣。紫泥方受命。黃石乃推賢。問罪陰山下。安人屬國前。度關行照月。乘障坐銷煙。北闕紆宸藻。南橋列祖筵。耀威當夏日。殺氣指秋天。鞞鼓鼉鼉振。旌旗鳥獸懸。由來詞翰手。今見勒燕然。

崔禹錫

奉和御製送張尚書巡邊云。供帳何煌煌。公其撫朔方。羣僚咸餞酌。明主降離章。關塞重門下。郊岐禁苑傍。練兵宜雨洗。臥鼓候風涼。炎景寧云憚。神謀肅所將。旌搖天月迴。騎入塞雲長。赫赫皇威振。油油聖澤滂。非惟按車甲。兼以正封疆。叱咤陰山道。澄清瀚海陽。虜垣行決勝。台座佇爲光。禹錫字洪範。登顯慶三年進士第。爲中書舍人。

裴灌

送張說上集賢學士。賜譙賦得昇字云。問道圖書盛。尊儒禮教興。石渠因學廣。金殿爲賢昇。日月恩光照。

風雲寵命膺。謀謨言可範。舟楫事斯憑。宴喜明時洽。光輝湛露凝。大哉堯作主。天下頌歌稱。灌與張說善。說爲相。數薦之。灌長於敷奏。天子亦自重焉。

章抗

送集賢學士張說上官。賜讌賦得西字云。廣庭臨壁沼。多士侍金闈。英宰文儒協。明君日月齊。集賢光首拜。改殿發新題。早夏初移律。餘花尙拂溪。壺觴接雲上。經術引關西。聖德鴻名遠。將陪玉檢泥。抗終於刑部尙書。所薦如梁昇卿。王倕。王壽俊。皆爲顯人。唐史稱之。

程行謚

送張說上集賢學士。賜讌賦得迴字云。聖主崇文化。鏘鏘得盛才。相因歸夢立。殿以集賢開。象繫微言闡。詩書至道該。堯罇承帝澤。禹膳自天來。禮洽歡逾長。風怡暑更迴。國朝將舜頌。同是一康哉。裴子餘補鄠尉。行謚與之同舍。行謚以文法稱。而子餘以儒顯。長史陳崇業曰。蘭菊異芬。無可廢者。二子卒。子餘諡孝。行謚諡正。張說嘆曰。二諡可無愧矣。

李嵩

送張說上集賢學士。賜讌得催字云。偃武堯風接。崇文漢道恢。集賢更內殿。清選自中台。佐命留侯業。詞華博物才。天廚千品降。夏旨百壺催。鷓鷯方成列。神仙喜暫陪。復欣同拜首。叨此頌良哉。

蕭嵩

送張說上集賢學士。賜讌得登字云。帝曰簡才能。旌賢在股肱。文章體一變。禮樂道逾弘。芸閣英華入。賓

門鷓鷯登恩延過所望。聖澤實超恆。夏葉開紅藥。餘花發紫藤。微臣亦何幸。叨此預文明。
奉和御製三相同日上官詩云。審官思共理。多士屬惟唐。歷選台庭舊。來熙帝業昌。入朝師百辟。論道協
三光。垂拱資元老。親賢輔少陽。登榮崇禮送。寵德耀宸章。御酒飛觴洽。仙闈雅樂張。荷恩思有報。陳力愧
無良。願罄公忠節。同心奉我皇。

嵩開元初權中書舍人。崔琳、王邱、齊澣以嵩少學術。不以輩行許也。獨姚崇稱其遠到。帝欲相蘇頲。嘗夜
密召嵩草詔。其詞曰。國之瓌寶。帝曰。朕不斥其父名。卿當爲刊削。沈思久之。乃曰。國之珍寶。嵩出。帝曰。虛
有其表。嵩頤大多髭。故帝有是言。

劉昇

送張說上集賢學士。賜讌得賓字云。圖書應明主。策府宴嘉賓。台耀臨東壁。乾光自北辰。網羅窮象繫。述
作究天人。聖酒千鍾洽。仙廚百味陳。成山徒可仰。涉海詎知津。幸逢文教盛。還覩頌聲新。
昇能文善草隸。德威之後也。開元中累遷中書舍人。

裴光庭

奉和御製三相同日上官詩云。樂賢聞往誥。褒德偶茲辰。端揆升元老。師謀擇累仁。紫庭崇讓畢。粉署禮
容陳。旣荷恩榮舊。俱承寵命新。天文懸瑞色。聖酒汎華茵。雜遝陳簫鼓。歡娛洽搢紳。掖垣招近侍。虛薄廁
清塵。共保堅貞節。當期雨露均。

光庭字連城。時爲兵部侍郎。後爲相。謾瑤山往則。維城前規二篇獻之。手製褒美。詔皇太子諸王子光順。

門見光庭謝所以規諷意。

宇文融

奉和御製三相同日上官詩云。申甫生周日。宣慈舉舜年。何如偶昌運。比德邁前賢。寵獲元良密。榮瞻端揆遷。職優三事老。位極百寮先。北極迴宸渥。南宮飾御筵。飛文瑤札降。賜酒玉杯傳。謬列台衡重。俱承雨露偏。誓將同竭力。相與効塵涓。融爲張說所惡。欲先事中傷說。張九齡謂說曰。融辨給多詐。公不可忽。說曰。狗鼠何能。其後乃與崔隱甫廷劾說受賕事。帝詔說致仕而出。融詩有誓將同竭力。相與効塵涓之語。欣附說之辭也。融安輯戶口。明皇賜詩。張說奉和云。聖德臨天下。勞情徧九圍。念茲人去本。蓬轉將何依。外避征戍數。內傷親黨稀。嗟不逢明盛。胡能照隱微。柏臺簡行李。蘭殿錫朝衣。別曲動秋風。恩令生春輝。使出四海安。詔下萬心歸。愧無夔龍佐。徒歌鴻雁飛。

崔沔

恩賜樂遊園宴云。五日酺初畢。千年樂未央。復承天所賜。終宴國之陽。地勝春逾好。恩深樂更張。落花飛廣座。垂柳拂行觴。庶尹陪三吏。諸侯具萬方。酒酣同忭躍。歌舞詠時康。沔字善冲。有文章。舉賢良方正第一。最受知于張說。儉約自持。嘗作陋室銘。以見志云。

崔尙

恩賜樂遊園宴云。春日照長安。皇恩寵庶官。合簪承罷宴。賜帛復追權。供帳憑高列。城池入迴寬。花催相

國飲鳥和樂人彈。北闕雲中見。南山樹杪看。樂遊宜締賞。舞詠惜將闌。
尙登久視六年進士第。官至祠部郎中。

陸堅

送張說上集賢學士。應制得今字云。聖主崇文教。層霄降德音。尊賢澤既厚。式宴寵逾深。復有夔龍相。良哉簡帝心。得人惟邁昔。多士諒推今。書殿榮光滿。儒門喜氣臨。顧惟成濫吹。徒此接衣簪。
堅爲中書舍人。以集賢學士或非其人。而供擬太厚。議白罷之。張說曰。麗正乃天子禮樂之司。所費細而所益者大。陸生之言。蓋未達耶。帝知。遂薄堅。

崔泰之

酬韋嗣立龍門北溪作云。關塞臨伊水。驪山枕灊川。俱臨隱路側。同在帝城邊。謝公兼出處。攜妓玩林泉。鳴鶻噴梅雪。飛蓋曳松煙。聞琴幽谷裏。看奕古岩前。落月低幃帳。歸雲繞管絃。叨榮慙北闕。微尙愛東田。寂寞灰心盡。蕭條塵事捐。朝思登嶺絕。夜夢弄潺湲。宿懷南澗意。況覩北崑篇。

同光祿弟冬日述懷序云。韋祭酒張左丞二公。竝廊廟偉才。朝廷舊相。咸光首和。殊爲佳作。輒繼陽春。深增愧悚。詩云。吾族白眉良。才華動洛陽。觀光初入仕。應宿始爲郎。飛螢翫書籍。白鳳吐文章。海卿逾往雅。河尹冠前張。擇才綏鄢郢。殊化被江湖。高樓臨廣陌。甲弟敞通莊。別館邛山下。疏亭洛水旁。昌年賞豐陌。暇日悅林塘。衣冠皆秀茂。羅綺盡名倡。隔岸聞歌度。臨池見舞行。門庭寒變色。棨戟自生光。窮陰方黷。殺氣正蒼茫。感時興盛作。晚歲共多傷。積德韋丞相。通神張子房。吟草編簪紱。逸韻合宮商。功名守留省。

濫跡在文昌。家園遙可見。臺寺近相望。無庸乘侍謁。有暇共翱翔。棣華依雁序。竹葉拂鸞觴。水坐憐秋月。山行弄晚芳。恩榮慚服冕。友愛篤垂堂。無由報天德。相顧詠時康。章祭酒嗣立張左丞說光祿日知也泰之時以禮部居洛。故與嗣立說日知數有酬唱。泰之知温之子。初以職方郎中預平二張。終于工部尙書。

崔日知

和韋嗣立龍門北溪作云。夙齡秉微尚。中年忽有鄰。以茲山水僻。遂得學通人。迨我南京道。聞君北業新。崑前窺石鏡。河畔踏芳茵。旣憐伊浦綠。復憶瀟池春。連詞謝家子。同歡冀野賓。趣閒魚共樂。情洽鳥來馴。誰念昔遊者。祇命獨留秦。蕭條潁陽戀。沖漠漢陰真。無由陪勝躅。空此翫書筠。

冬日述懷奉呈韋祭酒張左丞蘭臺名賢云。弱齡好經籍。披卷卽怡然。覃精四十載。馳騁數千言。孔壁採遺篆。周韋考絕編。袁公論劒術。孫子敍兵篇。魯史君臣道。姬書日月懸。從師改炎燠。負笈徧山川。上異西河夏。中非北海玄。光榮拾青紫。名價接通賢。旣重萬鍾樂。寧思二頃田。長戟同分虎。高冠亞附蟬。晚懷重虛曠。養志息雕鐫。登高慚思拙。匠物謝情妍。不慕張平子。寧希王仲宣。誰謂登龍日。翻成刻鶴年。循循勞善誘。軋軋思微牽。琢磨才旣竭。鑽仰德彌堅。朽木誠爲諭。捫心徒自憐。終期吞鳥夢。振翼上雲煙。賦成先擲地。詞高直挾天。更執摳衣禮。還趨函丈筵。霧披槐市藹。水靜璧池圓。願逐從風葉。飛舞翰林前。日知字子駿。日用從父兄。與張說同爲魏元忠朔方判官。再遷洛州司馬。譙王重福之變。以功加銀青光祿大夫。遷殿中少監。日知在洛日與韋嗣立張說酬唱。故說和冬日述懷詩序云。太極殿衆君子分司洛